



26. september 2025

UKA 2025/36

Inuit innarluutillit pisinnaatitaaffii pillugit isumaqatigiissummut 13. december 2006-imeersumut Kalaallit Nunaata nammineq atuutilersillugu tapiliussamut ilanngunnissaa pillugu Inatsisartut aalajangiiffigisassaattut siunnersuut.

(Peqqissutsimut Inunnullov Innarluutilinnut Naalakkersuisoqarfik)

Naalakkersuisup saqqummiusnaanut Siumumiit qujavugut. Imatut aalajangiiffigisassatut siunnersuut Siumuminngaanniit oqaaseqarfigissavarput.

Takorluulaaruk oqarusukkaluarlutit oqarsinnaanak, nassuiaarusukkaluarlutit pisinnaanak, paaseqqugaluarlutillu iliuuseqarsinnaanak. Tamakku ilagaat inuit innarluutillit ilaasa ulluinnarsiutigisaat. Nunatsinni innarluutillit inuit pineqartut amerlanngikkaluit taamaattoq oqaaseqarsinnaanngittortai imminullu illersorsinnaanngittortai systemimi toqqoqqasutut ipput. Assinganillu oqarsinnaasut tusaaniarneqarnerat maannamut amigavittoq iikkat uku sisamat avataanniit tusakulavagut. Tamanna maani inersuarmi pisussaaffigaarput allanngortinniassallugu iliuuseqarfigissallugulu.

Naalakkersuisup saqqummiussaani innarluutillit illersorneqarnerisa pisinnaatitaaffiillu annertusarneqarnissaa pillugu oqariartuutaa tamatta ataatsimoorfissaraarput, ataatsimoorneq tassaammat angusassamut anginerusumut aqutissiuisussaq. Taamaattorli eqqumaffissagut arlaliusut aamma qissimittariaqarput. Assersuut inuit sulisinnaasut tamaaviisa pisariaqartippagut. Inuit sulisinnaasutut piukkunnaatillit piginnaasamikkut qaffassarneqartariaqarput, aningaasatigullu malitseqartitsineq uani ilanngunneqartariaqarpoq. Taamaanngippat una aalajangiiffigisassatut siunnersuut siunertamigut kusanaraluartoq assiliaannaasussaavoq kusanartoq. Tamakku ukiut siuliini nalaattareerpagut, uteqqissanngippallu piumasaqaatit annerusut ersarinnerusullu nassarneqartariaqarput.

Inuit innarluutillit pisinnaatitaaffiitut nunatta tamakkiisumik aaqqissuussinissaa ilisimavarput aningaasarpassuarnik naleqarsinnaasooq, tamannalu ataatsikkut kivinnissaa qanoq unammilleruminaatsigisoq ilisimareerparput Kommuniilli qanimut suleqatigilluinnarnissaat pingaaruteqarluinnaqqissaarpoq. Taamaattorli maalaaruteqarsinnaanermut periarfissat annertusassagaanni avaqqukkuminaappooq inuit pineqartunut qaninnerpaat suleqatigilluinnarnissaat. Taamatullu inuit innarluutillit illersuisuat uani suliami annertuumi kivitseqataasussatut ikiortiserisariaqarparput. Akisussaaffimmi kivinniagarput allagaannartigut annikkaluaq, timitalerlugu piviusunngortinnissaa imaaliillaannagassaannigilaq. Kisianni oqareernertut ataatsimoorfissaraarput pisussaaffittullu kivitassaralugu.



Inuit pineqartut qanigisaallu ilungersungaarlutik ilaatigut ikiortissarsiortarput maalaarutillu piffissami sivisuallaami akiniarneqartarnerat takornartaanngilaq. Tamanna aaqqissuusseqqinnissamut tikkuussivoq. Pikkorlussimagutta pitsanngorsaaqqittariaqarpugut inuit pineqartut tikillugit, oqaluullugit tusaallugit aqputissiuullugillu, tamakku inunnut sullissisut amigaatigisatta pigilerneratigut piviusunngortissinnaavarput. Taamaattumik siammasinnerusumik isiginnittaaseqarluta uuma naammassineqarnissaa toqqavilertariaqarparput.

Ilannguttariaqavissorporlu immikkut eqqaassallugu inuit innarluuteqartut sullinneqartarnermikkut ilaatigut Kommunini sullissisut amigaateqarnerisigut suliat unittoortarmata taamaattumik aqput eqaannerusoq pisariinnerusoq pilersinneqartariaqarpoq. Ajoraluartumik nukippassuit pisariaqanngitsumik atorneqarsinnaalersarmata aporfiit uniffinngoraangata. Tamanna Siumumiit sakkortuumik kaammattuutigerusupparput ataatsimiititaliami susassaqtuni ukkanneqarnissaa.

Naalakkersuisup saqqummiussaani tamakkiisumik tapersiivugut, ataatsimiititaliamullu susassaqtumut peqqissaartumik isumatusaartumillu suliarineqarnissaa kaammattuutigalugu.

Anders Olsen
Siumut